

摘藻堂四庫全書薈要

集部

欽定四庫全書薈要卷一萬五千一百七十六

集部

山谷外集卷五

宋 黃庭堅 撰

古詩七十六首

行役并
雜體詩

題落星寺四首

玉京軒

過致政屯田劉公隱廬

題杜槃澗叟冥鴻亭 宮亭湖

泊大孤山作 貴池

大雷口阻風 庚寅乙未猶泊大雷口

乙未移舟出口

丙申泊東流縣

阻風銅陵

阻水泊舟竹山下

金陵

十月十三日泊舟白沙江口

發白沙口次長蘆

阻風入長蘆寺

次韻伯氏長蘆寺下

別蔣穎叔

贈別李端叔

汴岸置酒贈黃十七

曉放汴舟

次盱眙同前韻

外舅孫莘老守蘇州留詩斗野亭

題大雲倉達觀臺二首

庭堅得邑大和六舅按節出同安邂逅於皖公

溪口十首

同蘇子平李德叟登擢秀閣

書石牛溪旁大石上 題山谷大石

靈龜泉上

發舒州向皖口道中作寄李德叟

豐城

與胡彥明處道飲融師竹軒

何氏悅亭詠栢

薄薄酒二章

并序

放言七首

定交詩效鮑明遠體呈晁无咎二首

碾建溪第一奉邀徐天隱奉議并效建除體

再作答徐天隱
重贈徐天隱

八音歌贈晁堯民
八音歌贈晁堯民

古意贈鄭彥能

贈无咎

二十八宿歌贈别无咎

壽聖觀小隱軒

銅官縣望五松山

荊州即事樂名詩八首

題落星寺四首

星宮游空何時落著地亦化為寶坊詩人晝吟山入座
醉客夜愕江撼牀蜜房各自開牖戶蟻穴或夢封侯王
不知青雲梯幾級更借瘦藤尋上方

巖巖正俗先生廬其下宮亭水所都北辰九關隔雲雨
南極一星在江湖相粘蠓山作居室竅鑿混沌無完膚
萬鼓舂撞夜濤湧驪龍莫睡失明珠

落星開士深結屋龍閣老翁來賦詩

寺僧擇隆作宴坐
小軒為落星之勝

處 小雨葳山客坐久長江接天帆到遲宴寢清香與世

隔畫圖妙絕

一作
絕筆

無人知

僧隆畫甚富而寒
山拾得畫最妙

蜂房各自

開戶牖處處煮茶藤一枝

北風吹倒落星寺吾與伯倫俱醉眠螟蛉螺贏但癡坐

夜寒南北斗垂天

戲題落星寺壁時
與劉道純俱在

玉京軒

玉京山在爐峯下落
星寺僧開軒對之

蒼山其下向玉京五城十二樓
鬱儀結鄰常杲杲紫雲
黃霧鎖玄關雷驅不祥電
揮掃上有千年來歸之白鶴
下有萬世不凋之瑤草
野僧雲臥對開軒一鉢安巢若
飛鳥北風卷沙過夜窻
枕底鯨波撼蓬島箇中即是地
行仙但使心閒自難老

過致政屯田劉公隱廬

兒時拜公床眼碧眉紫烟舍前架茅茨爐香坐僧禪女
奴煮芻粟石盆瀉機泉今來掃門巷竹間翁蛻蟬堂堂
列五老勝氣失江山石盆爛黃土茅齋薪壞椽女奴為
民妻又瘞蒿里園當年笑語地華屋轉朱欄課兒種松
子傘蓋上參天投策數去日木行天再環先生古人風
鐵膽石肺肝眼前不可意壯日掛其冠解衣廬君峰洗
耳瀑布源霧豹藏文章驚世時一斑衆人初易之久遠
乃見難憶昔子政在為翁數解顏五兵森武庫河漢落

舌端王陽已富貴塵冠不肯彈呻吟刊十史凡例墨新
乾宰木忽拱把相望風隧寒百楹書萬卷少子似翁賢

上參天一

作高參天

題杜槃澗叟冥鴻亭

少陵杜鴻漸頗薰知見香風流有諸孫結屋廬山陽藉
交游俠窟獵艷少年場光恠驚鄰里收身反摧蔽江湖
拍天流羅網蓋稻梁安能衍衍飽遂欲冥冥翔畏影走
萬里不如就陰涼亭東亭西渺煙水稻田衲子交行李

古靈菴下倚寒藤莫向明窻鑽故紙

宮亭湖

左手作圓右手方世人機敏便可爾一風分送南北舟
斟酌鬼神宜有此江津留語同濟僧他日求我於宮亭
吁嗟人蓋自有口獨為藥公不舉酒藥公千歲湖冥冥
白茅縮酒巫送迎朱幡皂蓋來託宿不聽靈君專此屋
雄鴨去隨鷗鳥飛老巫莫歌望翁歸貝闕珠宮開水府
雨棟風簾豈來處平生來往湖上舟一官四十已包羞

靈君如願儻可乞收此桑榆老故丘

泊大孤山作

庚申
二月

匯澤為彭蠡其容化鯤鵬中流擢寒山正色且無朋其
下蛟龍卧宮譙珠貝層朝雲與暮雨何處會高陵不見
凌波鞦韆照澄凝空餘血食地猿嘯枯楠藤高帆駕
天來落葉聚秋蠅幽明異禮樂忠信豈其憑風波浩平
陸何向非履冰安得曠達士霜晴嘗一登

貴池

池人祀昭明為郭西九郎時新覆
大舟水死十二人以為神之威也

橫雲初抹漆爛漫南紀黑不見九華峰如與親友隔憶
當秋景明九老對几席何曾閉蓬窻卧聽寒雨滴不食
貴池魚喜尋昭明宅筆硯鼠行塵芝菌生銅鬲思成佳
句夢貽我錦數尺屬者浪吞舟風電更附益老翁哭婦
兒相將難再得存亡如日月薄蝕行道失流俗暗本原
謂神吐其食神理儻有私丘禱久以默

大雷口阻風

號艫下滄江避風大雷口天與水模糊不復知地厚誰

家上江帆狂追雪山走孤村無十室旅飯困三韭黃蘆
麋鹿場此地廣千肘得禽多文章肯願魚貫柳莽蒼天
物悲彫弓故在手鹿鳴猶念羣雉媒竟賣友商人萬斛
船掛席上牛斗橫笛倚柁樓波深蒼龍吼失水不能神
伐葭作城守欲寄大雷書往問長干婦何當楫迎汝秦
淮綠如酒

庚寅乙未猶泊大雷口

廣原嗥終風發怒土囊口萬艘萍無根迺知積水厚龍

鱗火熒熒鞭笞雷霆走公私連檣休森如東春非倚筇
薰葭灣垂楊欲生肘雄文酬江山惜無韓與柳五言呻
吟內慚愧陶謝手送菜煩鄰船買魚熟溪友兒童報晦
冥正晝見箕斗吾方廢書眠鼻鼾鞞囊吼猶防盜窺家
嚴鼓申夜守冶城謝公墩牛渚蕩子婦何時快登臨篙
師分牛酒

乙未移舟出口

畏風濤復入遂宿馬同行有劉三班善射沙夾遇盜劉手殺三人

江湖吞天胸蛟龍垂涎口養軀無千金特為親故厚本

心非華軒而與馬爭走聘婦緝落毛教兒耨蔥韭衣食
端須幾將老猶掣肘安能詭隨人曲折作杞柳桓公甕
盎癭楚國不龜手生涯但如此那問託婚友久陰快夜
晴天文若科斗村南鬼火寒村北風虎吼野人驅雞豚
縛落堅纏守劉郎弓石八猛氣壓馮婦一試金僕姑歸
飲軟臂酒

丙申泊東流縣

語曰東流速
客驚動建德

前日發大雷真成料虎頭今日伐鼓出棹歌傲陽侯滄

江百折來及此始東流東流會賓客建德椎羊牛野語
尚信然小市黃蘆洲唯有采薪翁經營往來舟楫盡
斤斧山童煙雨愁

阻風銅陵

頓舟古銅宮晝夜風雨黑洪波崩奔去天地無限隔船
人謹維箝何暇思掛席憑江裂嵌空中有暗水滴洞視
不敢前潭潭蛟龍宅網師登長鱸賈我腥釜鬲斑斑被
文章突兀喙三尺言語竟不通噉喙亦何益魁梧類長

者卒以筌餌得浮沉江湖中波友永相失有生甚苦相
細大更噉食安得無垢稱對榻忘語默

阻水泊舟竹山下

竹山虫鳥朋友語討論陰晴怕風雨丁寧相教防禍機
草動塵驚忽飛去提壺歸去意甚真柳暗花濃亦半春
北風幾日銅官縣欲過五松無主人

金陵

豪士阻江海瓜分域中權真人開關梁曾不費絃絃六

朝妙人物蔓草縈寒烟至今哀江南詠歌在漁船窮山
虎豹穴摩衲擁高年青天行日月坐看磨蟻旋身將時

共晚道與世相捐猶能攬壯觀巨浸朝百川

時秀禪師
在鍾山寺

十月十三日泊舟白沙江口

真州唐永正縣
之白沙鎮也

岸江倚帆檣已專北風權飛霜挾月下百竿直如絃淥

水去清夜黃蘆搖白煙篙人持更柝相語聞並船平生

濯纓心鷗鳥共忘年風吹落塵網歲星奔回旋險艱自

得力細故可棄捐至今夢洶洶呼禹濟黃川

河出崑崙
墟色白所

渠并一千七
百一川色黃

發白沙口次長蘆

篙師救首尾我為制中權掛席滿風力如推強弩絃曉
放白沙口長蘆見炊烟一葉託秋雨滄江百尺船反觀
世風波誰能保長年念昔聲利區與世闕周旋大道甚
閒暇百物不廢捐誰知目力淨改觀舊山川

阻風入長蘆寺

福公開百室不借鄰國權法筵森龍象天樂下管絃我

來雨花地依舊薰爐烟金碧動江水鍾魚到客船茗椀
洗昏著經行數徂年歲寒風落山故鄉喜言旋林回負
赤子白壁乃可捐侍親如履冰風雨森暗川

次韻伯氏長蘆寺下

風從落帆休天與大江平僧坊晝亦淨鐘磬寒逾清淹
留屬暇日植杖數連薨頗與幽子逢煮茗當酒傾携手
霜木末朱欄見潮生檣移永正縣烏度建康城薪者得
樹鷄羹盂味南京香秔炊白玉飽飯愧閑行叢祠思歸

樂吟弄夕陽明思歸誠獨樂薇蕨漸春榮

別蔣穎叔

金城千里要人豪理君亂絲須孟勞文星合在天東壁
清都紫微醉雲璈荆溪居士傲軒冕胸吞雲夢如秋毫
三品衣魚人仰首不見全牛可下刀秦川渭水森長戟
方壺蓬萊冠巨鼇萬釘寶帶瑠玃席獻納論思赭黃袍
連營貔虎湛如水開盡西河擁節旄何時出入諸公間
淮湖閱船今二毛鑿渠決策與天合支祈窘束縮怒濤

衣食京師看上計陛下文武收英髦春風淮月動清鑒
白拂羽扇隨輕舸下榻見賢傾禮數後車載士回風騷
斲鼻於郢觀魚於濠小夫閱人蓋多矣幾成季咸三見
逃

贈別李端叔

我觀江南山如目不受垢憶食江南薇子獨於我厚在
北思江山如懷冰雪顏千峰上雲雨岑絕何由攀當時
喜文章各有兒子氣爾來頷頽白有兒能拜起讀書浩

湖海解意開春冰成山更崇
堦顧我醜丘陵白玉著石
中與物太落落涇渭相將
流世不名清濁乞言既不
易贈言良獨難古來得道
人挂舌屋壁間牧羊金華
道載酒太玄宅支願聽晤
語願君喙三尺我行風雨
夜船窻聞遠雞故人不可
見故人心可知

汴岸置酒贈黃十七

吾宗端居藜百憂長歌勸之肯出游

一作百丈暮卷篙
人休侵星爭前猶

幾舟黃流不解浣明月碧樹為我生涼秋
初平羣羊置莫

問叔度千頃醉即休

一作詩吟吾黨夜來
作酒買田翁社後葛

誰倚柁樓吹

玉笛斗杓寒挂屋山頭

曉放汴舟

秋聲滿山河行李在梁宋川塗事雞鳴身亦逐羣動霜
清魚下流橘柚入包貢又持三十口去作江南夢

次盱眙同前韻

去此二十年持家西過宋起予者白鷗歸興爰飛動宮
殿明寶坊山川開禹貢破浪一帆風更占夢中夢

外舅孫莘老守蘇州留詩斗野亭庚申十月庭堅

和

謝公所築埭未歎曲池平蘇州來賦詩句與秋氣清僧
構擅空闊浮光飛棟薨唯斗天司南其下百瀆傾貝宮
產明月含澤遍諸生槃礴淮海間風烟侵十城籟簫吹
木末浪波沸庖烹我來抄搖落霜清見魚行白鷗遠飛
來得我若眼明佳人歸何時解衣繞廂禁

題大雲倉達觀臺二首

戴郎臺上鏡面平
達人觀因我名何時
燕爵賀新屋
喚取竹枝歌月明

瘦藤挂到風烟上
乞與遊人眼豁開
不知眼界闊多少
白鳥飛盡青天回

庭堅得邑太和六舅按節出同安
邂逅於皖公溪
口風雨阻留十日對榻夜語因詠
誰知風雨夜
復此對床眠別後更覺斯言可念
列置十字字
為八句寄呈十首

鵠白不以烏蘭香端為誰外家秉明德晚與世參差
離歲十二會百卒卒期何言瀟丘底玉稻同一炊

滄江渺無津同濟共安危四海非不廣舅甥自相知
孔鸞在榛梅鷓鴣亦一枝千里同明月相期不磷緇

少小長母家拊憐輩諸童食貧走八方略已一老翁
不能成宅相頗似舅固窮何以報嘉德取琴作南風

一作
鼓琴

歌南
風

德人心寂寥立朝實壯語虎節坐山城孤雲猶能雨
文

章被甥姪孝友諧婦女偃息一畝宮植梅當歌舞

江都克家才萬卷書插架願言渠出仕從舅問耕稼誰

云瀕老境此子即長夜歸歟森前期蒔橘鉏甘蔗

江都尉李

據字
安詩

曩窺涉世方白駒且場穀平生漫歲晚志尚向山木返
身觀小醜真成覆車犢否臧太磊磊從此更三復

負薪反羊裘愛表只

一作亦

傷裏補紉雖云工歲晏安可

恃洗心如秋天六合無塵滓浮雲風去來在彼不在此

阿髯學升堂

德

幹母思靡悔文成執桃李不言行道允

阿蘓妙言語機警欲無對子姓何預人蘭玉要可珮

阿蘓
舅氏

猶
子

解衣卧相語濤波夜掀床十年身百憂險阻心已降涉
旬風更雨宿昔燭生光衾幃無端冷明月一船霜

親依為日淺愛不舍我眠教我如牧羊更著後者鞭得
邑邇梅嶺開花向春妍碌碌幸苟免稱觴大人前

同蘇子平李德臬登擢秀閣

築屋皖公城木末置曲欄歲晚對烟景人家橘柚間獨
口司命峯衆口讓高寒松竹二橋宅雪雲三祖山哀懷
造勝境轉覺落筆難蘇李工五字屬聯不當慳

書石牛溪旁大石上

鬱鬱窈窈天官宅諸峯排霄帝不隔六時謁天開闢鑰
我身金華牧羊客羊眠野草我世間高真衆靈思我還
石盆之中有甘露青牛駕我山谷路

題山谷大石

畏畏音委佳佳音背石谷水皦皦隆隆山木風爐香四百六

十載開山者誰梁寶公

靈龜泉上

大靈壽日月化石皖公陂偶無斧斤尋不作宰上碑傾
首若有謂指泉來自西泉甘崖木老坐歎欲忘歸風流

裴通直

一作裴翥
喜幽事

商略從我嬉詩梅盈百科洗石出岨

奇更約聘石上鏡我靈龜詩舅弟李德叟妙學古須眉
卿家北海公筆法可等夷為我書斯文要與斗牛垂

發舒州向皖口道中作寄李德叟

黑雲平屋簷

一作在菟
雲壓空

晨夜隔星月曉裝商旅前冰底

泥活活野人攘畔耕

一作倭
畔耕

蹇馬不能滑駝裘惜蒙茸

俱落水塘缺孤村小蝸舍乞火乾履鞭前登極崢嶸

一作

高寒他日飛鳥沒寒花委亂草耐凍鳴風葉

一作耐凍風
葉間梅含雪

亂發江形篆平沙分派回勁筆髯弟不俱來得句漫削剝

一作漫得
句奇崛

却望同安城唯有松鬱鬱遙知浦口晴諸峯

見明雪

一作
松雪

豐城

亭上有李衛公劔池
賦世父長善石隄記

豐城邑巖巖水種六萬戶石隄眠長虹
輟棹日沉霧令君政有聲新亭延客步
淚落世父碑心傾文饒賦憶昔兩神兵
埋獄思武庫寒光射漢津兩賢紆一顧
張公拆中台木拱孔章墓不能從兒嬉
歲晚龍蛇去空餘寒泉泓因雨長蛙鮒
鉛刀藏寶室萬世同此度

與胡彥明處道飲融師竹軒

井寒茶鼎甘竹密午陰好瓜嘗邵平種
酒為何侯倒倦

須槃礴羸歸可倒著帽欲去更少留道人談藥草

何氏悅亭詠栢

澗底長松風雨寒岡頭老栢顏色悅天生草木臭味同
同盛同衰見冰雪君莫愛清江百尺船刀鋸來謀歲寒
節千林無葉草根黃蒼髯龍吟送日月

薄薄酒二章

并序

蘇密州為趙明叔作薄薄酒三章憤世疾邪其言甚
高以予觀趙君之言近乎知足不辱有馬少游之餘

風故代作二章以終其意

薄酒可與忘憂醜婦可與白頭徐行不必駟馬稱身不
必狐裘無禍不必受福甘餐不必食肉富貴於我如浮
雲小者譴訶大戮辱一身畏首復畏尾門多賓客少僮
僕美物必甚惡厚味生五兵匹夫懷璧死百鬼瞰高明
醜婦千秋萬歲同室萬金良藥不如無疾薄酒一談一
笑勝茶萬里封侯不如還家

薄酒終勝飲茶醜婦不是無家醇醪養牛等刀鋸深山

大澤生龍蛇秦時東陵千戶食何如青門五色瓜傳呼
鼓吹擁部曲何如春雨一池蛙性剛太傅促和藥何如
羊裘釣烟沙綺席象床瑠玉枕重門夜鼓不停柵何如
一身無四壁滿船明月卧蘆花吾聞食人之肉可隨以
鞭朴之戮乘人之車可加以鈇鉞之誅不如薄酒醉眠
牛背上醜婦自能搔背痒

崑下放言五首

林居野處而貫萬事花落鳥啼而成四時物有才德水

為官師空明湛羣木之影搏擊下諸峯之巖游魚淨而

知機君子樂而忘歸

釣臺

水嬉者游魚林樂者啼鳥志士仁人觀其大薪翁苟婦

利其小有美一人獨燕居萬物之表

池亭

石生涯於寒藤藤者造於崖樹鰲插翼而成鵬隘六合
而未翥我來兮自東攀桂枝兮容與倚嵌巖兮顧同來

謂公等其皆去

冠鰲臺

石蘊璵璠山得其來之澤木無犧象天開不材之祥屹

金瀘之突兀其山海之來翔然以明哲之火熏以忠信
之香俯仰一時非智所及付與萬世其存者長

博山臺

蒼苔古木相依澗壑之濱黃葛女蘿自致風雲之上人
就陰而息迹鳥投莫而來歸水影林光常相助發溪聲

斧響直下稱提

靈椿臺

題章和甫釣亭

放言

斬木開亭却倚石壁寒灘百雷古木千尺觀魚樂而相
忘聽鳥啼而自得去而京洛之間數年猶嘗夢蘄嶺之

石

贈元發弟

放言

虧功一簣未成丘山鑿井九階不次水澤行百里者半
九十小狐汔濟濡其尾故曰時乎時不再來終終始始
是謂君子

定交詩效鮑明遠體呈晁无咎二首

以建除滿平
定執破危成

收開閉十二
字冠為首句

建酉金為政搖落草木衰除瓜壠畝淨邵平無米炊滿

家色藜藿詩書不調飢平生晁公子政用此時來定交
無一物秋月以為期執持荆山璧要我雕琢之破斧不
能柯况乃玉無疵危冠論百揆備樂奏四時成功彼有
命用舍君自知收身渺江湖歲晚白鳥嬉開徑蒲葦中
倚鉏望君歸閉塞乃非道不才當爾為

建鼓求亡子元非入耳歌除去綠綺塵水深山峩峩滿
堂悅秦聲君獨用此何平分感秋節空闊湛金波定夜
百蟲息高論聽懸河執攬北斗柄斟酌四時和破屋仰

見星得子喜且多危柱無安絃野水自盈科成道在禮
樂成山在丘阿收此桑榆景相從寄琢磨開懷溟海闊
百怪出蛟鼉閉巖願自愛驚人取譴訶

碾建溪第一奉邀徐天隱奉議并效建除體

建溪有靈草能蛻詩人骨除草開三徑為君碾玄月滿
甌泛春風詩味生牙舌平斗量珠玉以救風雅渴定知
胸中有璀璨非外物執虎探虎穴斬蛟入蛟室破鏡挂
西南夜闌清興發危言諸公上殊勝弄翰墨成仁冒鼎

鑊聞已歸諫列收汝救月弓蛙腹當拆裂開雲照四海
黃道行堯日閉門斲車輪出門同軌轍

再作答徐天隱

建德真樂國萬里渺中州除蕩俗氛盡心如九天秋滿
船載明月乃可與同遊平生期斯人共挾風雅軫定知
詩客來夜虹貫斗牛執斧修月輪鍊石補天陬破的千
古下乃可泣曹劉危柱鳴哀箏知音初見求成功在漏
刻堯舜去共歎收此文章戲徃作活國謀開納傾萬方

皇極運九疇閉姦有要道新舊隨材收

重贈徐天隱

建極臨萬邦稽古陛下聖除書日日下有耳家相慶滿意見升平父老扶杖聽平生所傳聞似仁祖德性定鼎百世長橐弓四夷靜執事當在朝官冷殊未稱破帽風歌歌簡易不騎乘危顛相扶持泉石供嘲詠成樂澗阿中傲世似未敬收潦下秋船期公拜嘉命開元貞觀事身得見全盛閉門長蓬蒿或許老夫病

八音歌贈晁堯民往長與堯民論出處之致未竟
故終言之

金生寒沙中見別會有時石上千年柏材高用苦遲絲
亂猶可理心亂不可治竹齋聞履聲迺是故人来匏苦
只多葉水深難為涉土床不安席象床臥熒熒革與井
同功守道非關怯木直常先伐樗櫟萬世葉

八音歌贈晁堯民

金荷酌美酒夫子莫留殘石有補天材虎豹守九關絲

窠將柳花入戶撲衣冠竹風搖水日思與子盤桓匏瓜
豈無匹自古同心難革急而韋緩只在揉化間木桃終
報汝藥石理予顏

古意贈鄭彥能

金欲百鍊剛不欲繞指柔石羊臥荒草一世如蜉蝣絲
成蠶自縛智成龜自囚竹箭天與美豈願作嚙矢匏枯
中筓筓不用繫牆隅土偶與木偶未用相賢愚革轍要
合道覆車還不好木訥赤子心百巧令人老

贈无咎

金馬避世客談諧玩漢朝石門抱關人長往閉寂寥絲
蟲日夜織勞苦則以食竹生雁斧斤高林乃其賊匏樽
酌吾子雖陋意不淺土德貴重遲水德貴重深遠革能談
鯤鵬晚乃得莊周木鴈兩不居相期無待游

二十八宿歌贈别无咎

虎剥文章犀解角食未下亢竒禍作藥材根氏雁斲掘
蜜蟲奪房抱饑渴有心無心材慧死人言不如龜曳尾

衛平哆口無南箕斗柄指日江使噫狐腋牛衣同一燠
高丘無女甘獨宿虛名挽人受實禍累暴既危安處我
室中凝塵散髮坐四壁蟲蟲見天下奎蹄曲隈取脂澤
婁豬艾緞彼何擇傾腸倒胃得相知貫日食昴終不疑
古來畢命黃金臺佩君一言等背騰月沒參橫惜相違
秋風金井梧桐落故人過半在鬼錄柳枝贈君當馬策
歲晏星回觀盛德張弓射雉武且力白鷗之翼沒江波
抽絃去軫君謂何

壽聖觀道士黃至明開小隱軒太守徐公為題曰
快軒庭堅集句詠之

金華牧羊兒一粒粟中藏世界使君從南來清風明月
不用一錢買盧鵝杓鸚鵡杯一杯一杯復一杯玉山自
倒非人推廬山秀出南斗傍登高送遠形神開銀河倒
挂三石梁砮崖倒石萬壑雷吟詩作賦北窻裏安得青
天化作一張紙長鯨白齒若雪山我願因之寄千里

銅官縣望五松山

集句

北風無時休崩浪聒天響蛟鼉好為崇此物神俱王我
來五松下白髮三千丈松門閉青苔惜哉不得往今日
天氣嘉清絕心有向子雲性嗜酒况迺氣清爽此人已
成灰懷賢盈夢想衣食當須幾吾得終踈放弱女雖非
男出處同世網搔背牧雞豚相見得無恙

荊州即事藥名詩八首

四海無遠志一溪甘遂心牽牛避洗耳臥著桂枝陰
前湖後湖水初夏半夏涼夜闌鄉夢破一鴈度衡陽

千里及歸鴻
半天河影東
家人森戶外
笑擁白頭翁
天竺黃卷在
人中白髮侵
客至獨掃榻
自然同此心
垂空青幕六
一一排風開
石友常思我
預知子能來
幽澗泉石綠
閉門聞啄木
運柴胡奴歸
車前掛生鹿
雨如覆盆來
平地没牛膝
回望無夷陵
天南星斗濕
使君子百姓
請雨不旋復
守田意飽滿
高壁掛龍骨

山谷外集卷五


謹案卷四第五頁後三行摩浮垂便腹刊本便訛
腹據宋詩鈔改

第六頁前一行字形錐畫沙刊本字訛家據宋詩
鈔改

第十九頁前一行衙鼓趨整整刊本整整訛整整
據宋詩鈔改

卷五第十頁前一行所渠并一千七百一川色黃
刊本所渠并訛其渠色黃訛黃色按此係引爾

雅釋水文今據改



總校官庶吉士臣張能照

校對官中書臣王家賓

謄錄監生臣朱學濂

謄錄監生臣姚元開

欽定四庫全書薈要

集部

山谷外集卷六

詳校官助教臣謝登雋



欽定四庫全書薈要卷一萬五千一百七十七

集部

山谷外集卷六

宋 黃庭堅 撰

律詩一百六十六首

徐孺子祠堂

送徐隱父宰餘干二首

答德甫弟

何造誠浩然詞二章

題前定錄贈李伯牖二首

駐輿遣人尋訪後山陳德方家

池口風雨留三日

揚州戲題



思親汝州作

次韻戲答彥和

衝雪宿新寨忽忽不樂

郭明父西齋二首

睡起

戲詠江南土風

和答孫不愚見贈

次韻裴仲謀同年

次韻寄滑州舅氏

病起次韻和稚川進叔倡酬之什

稚川約晚過進叔次前韻

和答登封王晦之登樓見寄

伯氏到濟南寄詩
同世弼韻作寄伯氏

世弼惠詩求舜泉
伯父祖善放隱齋

倉後酒正廳昔唐林夫謫官所作十一月己卯

余納秋租隔牆芙蓉盛開

自咸平至太康鞍馬間得十小詩

次韻蓋郎中率郭郎中休官二首

和張沙河招飲

閏月訪同年李夷伯子真於河上

乞猫

書扇

次韻郭右曹

次韻元日

和答李子真讀陶庚詩

次韻答柳通叟求田間舍之詩

催公靜碾茶
用前韻戲公靜

和謝公定河朔漫成八首

武陵

過平輿懷李子先時在并州

謝曉純送衲鞋

避暑李氏園二首

戲題大年防禦蘆鴈 平原宴坐二首

次韻舍弟題牛氏園二首

謝送宣城筆

王彥祖惠其祖黃州制草書其後

寄懷公壽

以金沙醪醖送公壽

同劉景文遊郭氏西園因留宿

張仲謀家堂前醪醖委地

贈陳元輿祠部

和陳君儀讀楊太真外傳五首

讀曹公傳

并序

雜詩

同謝公定携書浴室汶師置飯作此

謝人惠茶

暮到張氏園和壁間舊題

從人求花

楸宗奉議有佳句詠冷庭叟野居

李濠州挽詞二首

寄家

衛南

酒

急雪寄王立之問梅花

又寄王立之

歲寒知松柏

效進士作觀成都石經詩

送徐景道尉武寧二首

杜似吟院二首

奉送劉君昆仲

勸交代張和父酒

楊朴墓

次韻李士雄二首

戲和舍弟船場探春二首

戲和李子真河上見招

同景文丈詠蓮塘

從丘十四借韓文二首

次韻題粹老客亭詩後

次韻寅菴四首

原作附

送楊瓘鴈門省親二首

次韻謝公定王世弼贈答二絕句

次韻公定世弼登北都東樓四首

李右司以詩送梅花至潞公

次韻張祕校喜雪三首

呻吟齋睡起五首呈世弼

送蛤蜊與李明叔諸君

戲贈世弼用前韻

世弼病方家不善論蛤蜊之功戲答

次韻萱草

次韻雨中晝寢憶江南餅麴酒

和師厚郊居示里中諸君

和師厚秋半時復官分司兩都

和外舅夙興三首

陪謝師厚遊百花洲十首

和師厚接花

和師厚栽竹

次韻外舅謝師厚三首

百花洲雜題

竹下把酒

砌臺晚思

徐孺子祠堂

喬木幽人三畝宅
生芻一束向誰論
藤蘿得意干雲日

簫鼓何心進酒樽
白屋可能無孺子
黃堂不是欠陳蕃
古人冷談今人笑
湖水年年到舊痕

送徐隱父宰餘干二首

地方百里身南面
翻手冷霜覆手炎
贅壻得牛庭少訟
長官齋馬吏爭廉
邑中丞掾陰桃李
桉上文書略米鹽
治狀要須聞豈弟
此行端為霽威嚴

天上麒麟來下瑞
江南橘柚間生賢
玉臺書在猶騷雅
孺子亭荒只草烟
半世功名初墨綬
同兄文字敵青錢

割雞不合庖丁手家傳風流更著鞭

答德甫弟

鳥啼花發獨愁思憐子三章怨慕詩鴻鴈雙飛彈射下
脊令同病急難時功名所在猶爭死意氣相須尚不移
何況極天無以報休回投壁負嬰兒

時以父事兄
弟俱在縲紲

何造誠作浩然堂陳義甚高然頗喜度世飛昇之
術築屋飯方士願乘六氣遊天地間故作浩然

詞二章贈之

公欲輕身上紫霞瓊糜玉饌厭豪華百年世路同朝菌
九鑰天關守夜叉霜檜左招空白鹿金爐同契漫丹砂
要令心地閒如水萬物浮沉共我家

萬物浮沉共我家清明心水徧河沙無鈎狂象聽人語
露地白牛看月斜小雨呼兒藝桃李疎簾幃客轉琵琶
塵塵三昧開門戶不用丹田養素霞

題前定錄贈李伯牖二首

五賊追奔十二宮白頭寒士黑頭公明朝一飯先書籍

安用研桑作老翁

萬般盡被鬼神戲看取人間傀儡棚煩惱自無安脚處
從他鼓笛弄浮生

駐輿遣人尋訪後山陳德方家

江雨濛濛作小寒雪飄五老髮毛斑城中咫尺雲橫棧
獨立前山望後山

池口風雨留三日

孤城三日風吹雨小市人家只菜蔬水遠山長雙屬玉

身閒心苦一春鋤翁從旁舍來收網我適臨淵不羨魚
俛仰之間已陳迹莫憲歸了讀殘書

揚州戲題

春風十里珠簾捲髣髴三生杜牧之紅藥梢頭初繭栗
揚州風物鬢成絲

思親汝州作

歲晚寒侵遊子衣拘留幕府報官移五更歸夢三千里
一日思親十二時車上吐茵元不逐市中有虎竟成疑

秋毫得失關何事總為平安書到遲

次韻戲答彥和

彥和年四十棄官杜門不出

本不因循老鏡春江湖歸去作閒人天於萬物定貧我
智効一官全為親布袋形骸增硯磊錦囊詩句愧清新
杜門絕俗無行迹相憶猶當遣化身

衝雪宿新寨忽忽不樂

縣北縣南何日了又來新寨解征鞍山銜斗柄三星沒
雪共月明千里寒小吏忽一作有時須束帶故人頗問不

休官江南長盡梢雲竹歸及春風斬釣竿

郭明父作西齋于穎尾請予賦詩二首

食貧自以官為業聞說西齋意凜然萬卷藏書宜子弟
十年種木長風烟未嘗終日不思穎想見先生多好賢
安得雍容一樽酒女郎臺下水如天

東京望重兩并州遂有汾陽整綴旒翁伯入關傾意氣
林宗異世想風流君家舊事皆青史今日高材未白頭
莫倚西齋好風月長隨三徑古人遊

睡起

彷彿江南一夢中
虛堂盡日轉溫風
春深稍覺袂衣重
晝永不知樽酒空

戲詠江南土風

十月江南未得霜
高林殘水下寒塘
飯香獵戶分熊白
酒熟漁家擘蟹黃
橘摘金苞隨驛使
禾舂玉粒送官倉
踏歌夜結田神社
游女多隨陌上郎

和答孫不愚見贈

詩比淮南似小山酒名麴米出雲安且憑詩酒勤春事
莫愛兒郎作好官簿領侵尋台相筆風埃蓬勃使星鞍
小臣才力堪為掾敢學前人便掛冠

次韻裴仲謀同年

交蓋春風汝水邊客牀相對臥僧氈舞陽去葉纔百里
賤子與公俱少年白髮齊生如有種青山好去坐無錢
烟沙篁竹江南岸輸與鷓鴣取次眠

次韻寄滑州舅氏

舫齋聞有小溪山便是壺公謫處天想聽瑣窻深夜雨
似看葉水上江船瞻相白馬津亭路寂寞雙鳧古縣前
舅氏知甥最踈懶折腰塵土解哀憐

病起次韻和稚川進叔倡酬之什

池塘夜雨聽鳴蛙老境侵尋每憶家白髮生來驚客鬢
黃梁炊熟又春華百年不負膠投漆萬事相依葛與瓜
勝日主人如有酒猶堪扶病見鶯花

稚川約晚過進叔次前韻贈稚川并呈進叔

人騎一馬鈍如蛙行向城東小隱家
道上風埃迷皂白
堂前水竹湛清華我歸河曲定寒食
公到江南應削瓜
樽酒光陰俱可惜端須連夜發園花

和答登封王晦之登樓見寄

縣樓三十六峯寒王粲登臨獨倚欄
清坐一番春雨歇
相思千里夕陽殘詩來嗟我不同醉
別後喜君能自寬
舉目盡妨人作樂幾時歸得釣鯢桓

伯氏到濟南寄詩頗言太守居有湖山之勝同韻

和

西來黃犬傳佳句，知是陸機思陸雲。
歷下樓臺追把酒，舅家賓客厭論文。
山椒欲雨好雲氣，湖面逆風生水紋。
想得爭棊飛鳥上，行人不見只聽聞。

同世弼韻作寄伯氏在濟南兼呈六舅祠部學士
山光掃黛水按藍，聞說樽前愜笑談。
伯氏清脩如舅氏，濟南蕭灑似江南。
屢陪風月乾吟筆，不解笙篴醉舞衫。
只恐使君乘傳去，拾遺今日是前銜。

世弼惠詩求舜泉輒欲以長安酥共泛一杯次韻

戲答

寒齏薄飯留佳客蠹簡殘編作近鄰避地梁鴻真好學
著書揚子未全貧玉酥鍊得三危露石火燒成一片春
沙鼎探湯供卯飲不憂問字絕無人

伯父祖善耆老好學於所居紫陽溪後小馬鞍山
為放隱齋遠寄詩句意欲庭堅和之幸師友同

賦率爾上呈

樵入千巖靜松含萬籟寒兒童給行李藜條對衣冠小
檻聊防虎時來即解鞍阿翁吹笛罷懷昔淚相看

倉後酒正廳昔唐林夫謫官所作十一月己卯余

納秋租隔牆芙蓉盛開

攀檻朱雲頭未白不知流落向何州空餘前日學書地

小閣紅蕖取意秋

林夫喜
作隸字

自咸平至太康鞍馬間得十小詩寄懷晏叔原并

問王稚川行李鵝兒黃似酒對酒愛新鵝此他

日醉時與叔原所詠因以為韻

詩入雞林市書邀道士鵝雲間晏公子風月興如何

春風馬上夢樽酒故人持猶作狂詩語鄰家乞侍兒

稚川

醉時有
旁干狀

憶同嵇阮輩醉卧酒家床今日壚邊客初無人姓黃

對酒誠獨難論詩良不易人生如草木臭味要相似

春色挾曙來惱人似官酒酬春無好語懷我文章友

紅梅定自開有酒無人對歸時應好在常恐風雨晦

東南萬里江綠盡一杯酒王孫江南去更得消息否
獻笑果不情貌親初不愛誰言百年交投分一傾蓋
四十垂垂老文章豈更新鼻端如可斲猶擬為揮斤

土氣昏風日人囂極鴈鵝尋河著音斫繩墨詩思略無多

次韻蓋郎中率郭郎中休官二首

仕路風波雙白髮閒曹笑傲兩詩流故人相見自青眼
新貴即今多黑頭桃葉柳花明曉市荻牙蒲筍上春洲
定知聞健休官去酒戶家園得自由

郭文時御道巾野服過親黨飯頗為

分臺御史所
詞故有此句

世態已更千變盡心源不受一塵侵

一作險阻艱難親
得力是非憂樂飽

經心青春白日無公事紫燕黃鸝俱好音付與兒孫知伏
臘聽教魚鳥逐飛沉黃公壚下曾知味定是逃禪入少
林

和張沙河招飲

張侯耕稼不逢年過午未炊兒女煎腹裏雖盈五車讀
囊中能有幾錢穿况聞緼素尚黃葛可怕雪花鋪白氈

誰料丹徒布衣得今朝忽有酒如川

閏月訪同年李夷伯子真於河上子真以詩謝次

韻

十年不見猶如此未覺斯人歎滯留
白璧明珠多按劍濁涇清渭要同流
日晴花色自深淺風軟鳥聲相應酬
談笑一樽非俗物對公無地可言愁

乞猫

秋來鼠輩欺猫死窺甕翻盤攪夜眠
聞道狸奴將數子

買魚穿柳聘銜蟬

書扇

魯公筆法屋漏雨未減右軍錐畫沙可惜團團新月面
故教零亂黑雲遮

次韻郭右曹

閱世行將老斲輪那能不朽見仍雲歲中日月又除盡
聖處工夫無半分秋水寒沙魚得計南山濃霧豹成文
苦心自有著鞭地尺璧分陰未當勤

次韻元日

會朝四海登圖籍，絳闕青都想盛容。
春色已知回寸草，霜威從此霽寒松。
飲如嚼蠟初忘味，事與浮雲去絕蹤。
四十九年蘧伯玉，聖人門戶見重重。

和答李子真讀陶庾詩

樂易陶彭澤，憂思庾信城。
風流掃地盡，詩句識餘情。
往者不再作，前賢畏後生。
君言得意處，此意少人明。

次韻答柳通叟求田問舍之詩

少日心期轉繆悠蛾眉見妬且障羞但令有婦如康子
安用生兒似仲謀橫笛牛羊歸晚徑捲簾瓜芋熟西疇
功名可致猶回首何況功名不可求

催公靜碾茶

雪裏過門多惡客

不飲者為惡客
出元次山集中

春陰只惱有情人睡

魔正仰茶料理急遣溪童碾玉塵

用前韻戲公靜

偶逢携酒便與飲竟別我為何等人兔月龍團不當惜

長卿消渴肺生塵

和謝公定河朔漫成八首

急雨長風溢兩河欣然河伯順風歌
行觀東海方存少不以黃流更自多

直渠殺勢煩才吏機器爬沙聚水兵
河面常從天上落金堤千里護都城

直令南越還歸帝誰為匈奴不敢王
願見推財多卜式未須笑賦似桑羊

萊公廟略傳耆舊韓令風流在井疆安用鳴磬增漢壘
不妨羅拜下諸羌

漢時水占十萬頃官寺民居皆濁河豈必九渠亡故道
直緣穿鑿用功多

虜庭數遣林牙使羌種來窺鴈塞耕壯士看天思上策
月邊鳴笛為誰橫

蛛蒙黃畫屏初暗塵溢金門瑣不開六十餘年望瑯輦
緒袍曾是映宮槐

百里棄疆王自直萬金捐費物皆春
湏令牧馬甘踰幕
更遣彎弓不射人

武陵

武陵樵客出桃源自許重遊不作難
却覓洞門烟鎖斷
歸舟風月夜深寒

過平輿懷李子先時在并州

前日幽人佐吏曹我行堤草認青袍
心隨汝水春波動
興與并門夜月高
世上豈無千里馬
人中難得九方皋

酒船魚網歸來是花落故溪深一篙

謝曉純送衲鞋

剗草曾升馬祖堂暖窻接膝話還鄉贈行百衲兜羅鞋
處處相隨入道場

避暑李氏園二首

李侯別館鎖春陰花徑吹香可細尋
迸笋侵階藤倒架
主人重為費千金

荷氣竹風宜永日冰壺涼簟不能回
題詩未有驚人句

會喚謫仙蘇二來

戲題大年防禦蘆鴈

揮毫不作小池塘蘆荻江村落鴈行雖有珠簾蔽翡翠
不忘烟雨罩鴛鴦

平原宴坐二首

公擇

老作儒生不解事江南有田歸荷鋤北窻風來舉書葉
猶自勸人勤讀書

黃落委庭觀元州蟲聲日夜戒衣裘金錢滿地無人費

一斛明珠惹涼秋

次韻舍弟題牛氏園二首

六言

春與園林共晚人
將蜂蝶俱來樽前
鳥歌花舞歸路星
翻漢回

春事欲了鶯催主人
雖貧燕來玉燭傳
盃未厭金吾靜
夜驚回

謝送宣城筆

宣城變樣蹲

一作尊

鷄距諸葛名家將

一作將

鼠鬚一束喜

從公處得千金求買市中無漫投墨客摹科斗勝與朱
門飽蠹魚愧我初非草玄手不將閒寫吏文書

王彥祖惠其祖黃州制草書其後

脫略看時輩諸君等發蒙董狐常直筆汲黯少居中鵬
入遷臣舍烏號厭世弓平生有嘉樹猶起九原風

寄懷公壽

好賦梁王在日邊重簾複幕鎖神仙莫因酒病踈桃李
且把春愁付管絃愚知相懸三十里榮枯同有百餘年

及身強健且行樂一笑端須直萬錢

以金沙醑醑送公壽

天遣醑醑玉作花紫綿揉色染金沙憑君著意樽前看
便與春工立等差

同劉景文遊郭氏西園因留宿

人居城市虛華館秋入園林著晚花落日臨池見科斗
必知清夜有鳴蛙

張仲謀家堂前醑醑委地

沉水衣籠白玉苗不蒙湔拂苦無聊煩君斫取西莊柳
扶起春風十萬條

贈陳元輿祠部

武成園木鎖中秋久得汀州刺史遊招喚丁寧方邂逅
誰言天網漏吞舟

和陳君儀讀楊太真外傳五首

朝廷無事君臣樂花柳多情殿閣春不覺胡離心暗動

一作付與山河買志義

綺羅翻

一作更

作墜樓人

扶風喬木夏陰合斜谷鈴聲秋夜深人到愁來無處會
不關情處總傷心

梁州一曲當時事

一作開
元夢

記得曾拈玉笛吹端正樓空

春晝永小桃猶學淡燕支

高麗條脫瑠紅玉

一作一雙條
脫玻璃玉

邏迤琵琶撚綠絲

一作
三尺

琵琶綠
繭絲

蛛網屋煤昏故物

一作脂
澤歇

此生唯有夢來時

上皇曾御昭儀傳鏡裏觀形只眼前養得祿兒傾四海

千秋更有一伶玄

讀曹公傳

并序

曹公自以勲高宰衡文對西伯蟬蛻揖讓之中而用
漢室於家巷更黨錮之災義士忠臣耘除略盡獻靈
之間北面朝者拱而觀變漢魏何擇焉彼見宗廟社
稷之無與也執太阿而用其穎以司一世之命左右
無不得意引後宮於鈇鉞如刈蒲茅夫匹婦婢使得
罪家人猶為謝過而親北面受命之君自以為未知
死所嗚呼厲憐王其誰曰過言雖然終已恭讓腹毒

而色取仁任不以易漢姓者何也漢之末造雖得罪於社稷骨鯁之臣而猶不得罪於民故猶相與愛其名耳余聞曰道揆以上惠不足而明有餘不在社稷而數有功染盛殆其不繼哉感之作曹公詩一章

南征北伐報功頻劉氏親為魏國賓畢竟以不成霸業豈能於漢作純臣兩都秋色皆喬木二祖恩波在細民
駕馭英雄雖有術力扶宗社可無人

雜詩

古風蕭索不言歸貧賤交情富貴非世祖本無天下量
子陵何慕釣魚磯

同謝公定携書浴室汶師置飯作此

竹林風與日俱斜細草猶開一兩花天上歸來對書客

愧勤僧飯更煎茶

客一作卷

謝人惠茶

一規蒼玉琢蜿蜒藉有佳人錦段鮮莫笑持歸淮海去
為君重試大明泉

暮到張氏園和壁間舊題

邵平不見見園瓜
三徑還尋二仲家
莫道暫來無所得
未秋先見碧蓮華

從人求花

舍南舍北勃姑啼
體中不佳陰雨垂
欲向黃梅問消息
背陰合有兩三枝

楸宗奉議有佳句
詠冷庭叟野居庭
堅於庭叟有
十八年之舊故
次韻贈之庭叟
有佳侍兒因早

朝而逸去其後迺插椒藩甚嚴密

城西冷叟半忙閒人道王陽得早還四望樓臺昏我有
一原花竹住中間初無狗盜窺籬落底事蛾眉失鎖關
每為朝天三十里時時驚枕夢催班

李濠州挽詞二首

循吏功名兩漢中平生風義最雍容魚遊濠上方云樂
鵬在承塵忽告凶掛劍自知吾已許脫駟不為涕無從
百年窮達都歸盡淮水空圍墓上松

禮數最優徐孺子風流不減謝宣城那知此別成千古
未信斯言隔九京落日松楸陰隧道西風簫鼓送銘旌
善人報施今如此隴水長寒鳴咽聲

寄家

近別幾日客愁生固知遠別難為情夢回官燭不盈把
猶聽驕兒索乳聲

衛南

今年畚鍤棄春耕折葦枯荷繞壞城白鳥自多人自少

汚泥終濁水終清沙場旗鼓千人集漁戶風烟一笛橫
唯有鳴鷗古祠柏對人猶是向時情

酒

江形圍似阮家盆山勢岑如北海樽戶有浮蛆春盎盎
雙松一路醉鄉門

急雪寄王立之問梅花

紅梅雪裏與蓑衣莫遣寒侵鶴膝枝老子此中殊不淺
尚堪何遜作同時

又寄王立之

南人羈旅不成歸，夢遶南枝與北枝。
安得孤根連夜發，要當雪月並明時。

歲寒知松栢

松柏天生獨青青，貫四時心歲後凋。
節歲有大寒，知慘淡冰霜晚。
輪困澗壑姿，或容螻蟻穴。未見斧斤遲，搖落千秋靜。
婆娑萬籟悲，鄭公扶正觀。已不見封彝。

效進士作觀成都石經詩

成都九經石歲久麝煤寒字畫參工拙文章可鑒觀危
邦猶勸講相國校雕刊羣盜烟塵後諸生竹帛殘三春
尊孔氏乙夜詔甘盤願比求諸野成書上學官

送徐景道尉武寧二首

李苦少人摘酒醇無巷深當官莫避事為吏要清心葛
藟松千尺寒泉縷百尋公朝有汲引吾子茂徽音

黃綬補一尉還依水竹居身隨南渡馬書寄北來魚風
俗譜隣並艱難試事初官閒莫歌舞教子誦詩書

杜似吟院兩首

日長吟院無公事
燕入花開必有詩
莫道南風吹鴈去
春來亦有北風時

吟院虛明如畫舫
想成檻外是長江
杜郎忽作揚州夢
雨帶風沙打夜窻

奉送劉君昆仲

遊子歸心日夜流
南陔香草可晨羞
平原曉雨半槐夏
汾上午風初麥秋
鴻鴈要須翔集早
脊鴿無憾急難求

欲因行李傳家信
姑射山前是晉州

勸交代張和父酒

風流五日張京兆
今日諸孫困小官
作尹大都如廣漢
畫眉仍復近長安
三人成虎事多有
衆口鑠金君自寬
酒興情親俱不淺
賤生何取罄交歡

楊朴墓

三尺孤墳一布衣
人言無復似當時
千秋萬歲還來此

月笛烟莎世不知

楊朴喜吹笛嘗
作莎詩極工

次韻李士雄子飛獨遊西園折牡丹憶弟子竒二

首

西園春色才桃李蜂已成圍蝶作團更欲開花比京洛
放教姚魏接山丹

桃李陰中五兄弟扶將白髮共傳杯風吹一鴈忽南去
空得平安書信回

戲和舍弟船場探春二首

雨餘禽語催天曉月上梨花放夜闌莫聽遊人待妍暖

十分傾酒對春寒

百舌解啼泥滑滑忽成風雨落花天城南一段春如錦
喚取詩人到酒邊

戲答李子真河上見招來詩頗誇河上風物聊以
當嘲云

渾渾舊水無新意漫漫黃塵澆白鷗安得江湖忽當眼
卧聽禽語信船流

同景文文詠蓮塘

塘上鈎簾對晚香
半斜紅日已侵床
江妃羞出凌波鞵

長在高荷扇影涼

涼當
作藏

從丘十四借韓文二首

六言

吏部文章萬世吾
求善本編窺散帙
雲窻斐几同安得
見丘遲

中有先君手澤丹
鉛點勘書詩莫惜
借行千里他日還
君一編

次韻題粹老客亭詩後

客亭長短路南北衮衮行人那得知惟有相逢即相別
一杯成喜只成悲

雙井樊廬之東得勝地一區長林巨麓危峰四環
泉甘土肥可以結茅菴居是在寅山之頽命曰
寅菴喜成四詩遠寄魯直可同魏都士人共和

之大臨

一溪婉婉如平篆四野青青似畫圖阮客放船迷洞府
化人攜袂到清都山中安用名丞相天下于今得廣居

我即其間構宮室預愁帝夢有華胥

山前有路到華胥下即乾坤極海隅西接洞庭開曉楚
東傾彭蠡浸晴吳四時更代觀形化萬物推移見尾閭
此世人人少閒暇每攜樽酒自看書

手把齊民種時書莎衫臺笠事耘鋤夏栽醉竹餘千箇

五月十三日竹醉

春糞辰瓜滿百區

瓜辰日種

早秫旋舂嘗麴蘖新

梁炊熟自樵蘇日西杖屨行山口招得鄰丁作飲徒
招得鄰丁作飲徒山家有藪蓋胥疎就根煨笋連黃籜

和蒂栽瓜帶綠須羹熟澤中親射鴈膾成溪上自罾魚
遠懷羊仲荒三徑能似林間今日無

次韻寅菴四首

四時說盡菴前事寄遠如開水墨圖略有生涯如谷口
非無卜肆在成都旁籬榛栗供賓客滿眼雲山奉宴居
閒與老農歌帝力年豐村落罷追胥

兄作新菴接舊居一原風物萃庭隅陸機招隱方傳洛
張翰思歸正在吳五斗折腰慚僕妾幾年合眼夢鄉閭

白雲行處應垂淚黃犬歸時早寄書

大若塘邊獨網魚小桃源口帶經鋤詩催孺子成雞柵
茶約鄰翁掘芋區苦棟狂風寒徹骨黃梅細雨潤如酥
此時睡到日三丈自起開關招酒徒

未怪窮山寂寞居此情常與世情疎誰家生計無閒地
大半歸來已白須不用看雲眠永日會思臨水寄雙魚
公私逋負田園薄未至妨人作樂無

送楊璣鴈門省親二首

從子學易業
未成辭歸

執戟老翁年七十人看生理亦無聊
草玄事業窺周易作賦聲名動漢朝
今見遠孫勤翰墨還持遺藁困簞瓢
三年鄉杖趨晨鼓一日邊城聽夜刁
野飯盈盤厭葱韭春風半道解狐貂
歸時定倒迎門屣問鴈安能學度遼
蜀客出衰世獨升鄒魯堂虻虻觀得失
虎豹擅文章吾子已強學草玄宜不忘
江河須畎澮松柏要冰霜馬策路千里
鴈門書數行旨甘君有婦尺璧愛分光

次韻謝公定王世弼贈答二絕句

何用苦吟肝腎愁但知把酒更無憂聲名本不關人事
看取青門一故侯

酒因咀嚼還知味詩就呻吟不要工王謝風流看二妙
病夫直欲卧牆東

次韻公定世弼登北都東樓四首

日著欄干角風吹濯澣衣喜同王季哲更得謝玄暉清
興俱不淺長吟無用歸月明南北道猶見驛塵飛

真皇多廟勝仁祖用功深卜宅遷九鼎破胡歲萬金百

年休戰士當日縱前禽欲斷匈奴臂不如留此心

都城礙飛鳥軍幕卧貔貅
甚知蠶老黃雲見麥秋接
天雙闕起伏地九河流
耆老深望幸鑿輿不好遊

漢皇勤遠略晚節相千秋
不足中原地猶思一戰收
聖朝方北顧斜日倚東樓
廟筭知無敵寒儒浪自愁

李右司以詩送梅花至潞公余雖不接右司想見
其人用老杜和元次山詩例次韻

凡花俗草敗人意晚見瓊蕤不恨遲
江左風流尚如此

春功終到歲寒枝

次韻張祕校喜雪三首

落月煙沙靜渺然好風吹雪下平田
瓊瑤萬里酒增價
桂玉一炊人少錢學子已占秋食麥廣文何憾客無氈
睡餘強起還詩債臘裏春初未隔年

巷深朋友稀來往日晏兒童不掃除
雪裏正當梅臘盡
民饑可待麥秋無寒生短棹誰乘興
光入踈櫺我讀書
官冷無人供美酒何時却得步兵厨

滿城樓觀玉欄干，小雪晴時不共寒。
潤到竹根肥臘筍，暖開蔬甲助春盤。
眼前多事觀游少，胸次無憂酒量寬。
聞說壓沙梨已動，會須鞭馬蹋泥看。

呻吟齋睡起五首呈世弼

棐几坐清書，博山凝妙香。
蘭芽依客土，柳色過鄰牆。
巷僻過從少，官閒氣味長。
江南一枕夢，高卧聽鳴榔。
學省非簿領，卧痾常閉關。
雨餘樓閣靜，風晚鳥烏還。
賞逐四時改，心安一味閒。
古人雖已往，不廢仰高山。

蔬食吾猶飽，曲肱哦古今。酒傾因好事，絃絕為知音。妬
藥長春木，爭巢喧暮禽。長懷阮校尉，北望首陽岑。

已把社公酒，春寒那得嚴。厭聽鴟啄雪，喜有燕穿簾。璞
玉深藏器，囊錐立見尖。兒時愛談道，今日口如箝。

牆下蓬蒿地，兒童課剪除。蔓蒿隨分種，杞菊未須鉏。河
水傳烽火，交州報捷書。無能落閒處，慙媿飽春蔬。

送蛤蜊與李明叔諸君

雪屋吹燈然，豆萁古來壯。士亦長饑，廣文不得載酒去。

且詠太玄庖蛤蜊

戲贈世弼用前韻

盜跖人肝常自飽
首陽薇蕨向來饑
誰能著意知許事
且為元長食蛤蜊

世弼病方家不善論蛤蜊之功戲答

伯樂無傳驥空老
重華不見士長饑
從來萬事乖名實
豈但藥翁論蛤蜊

次韻師厚萱草

從來占北堂雨露借恩光與菊亂佳色共葵傾太陽人
生真苦相物理忌孤芳不及空庭草榮哀可兩忘

次韻師厚雨中晝寢憶江南餅麪酒

雨砌無車馬風簾洒靜便忽思江外酒準擬醉時眠隱
几唯觀化開書屢絕編遙知烟渚夢遣騎喚漁船

和師厚郊居示里中諸君

籬邊黃菊關心事窻外青山不世情江橘千頭供歲計
秋蛙一部洗朝醒歸鴻往燕競時節宿草新墳多友生

身後功名空自重眼前樽酒未宜輕

和師厚秋半時復官分司西都

遙知得謝分西洛無復肯彈冠上塵園地除瓜猶入市
水田收秫未全貧杜陵白髮垂垂老張翰黃花句句新
還與老農爭坐席青林同社賽田神

和外舅夙興三首

寓大雲寺作

瓜蔓已除壟苔痕猶上牆蓬蒿貪雨露松竹見冰霜卷
幔天垂斗披衣日在房無詩歎不遇千古一潛郎

風烈僧魚響霜嚴郡角悲短童疲洒掃落葉故紛披水
凍食鮭少甕寒浮蟻遲朝陽烏烏樂安穩托禪枝

暑逐池蓮盡寒隨塞鴈來衣裘雖得暖狐貉正相哀僧
汲轆轤曉車鳴闕鑠開不因朝鼓起來帙亂書堆

陪謝師厚遊百花洲槃礴范文正祠下道羊曇哭

謝安石事因讀生存華屋處零落歸山丘為十

詩

憶在昭陵日傾心用老成功歸仁祖廟政得一書生

羊生但著鞭勿哭西州門故有不亡者南山相與存

慶州自不惡籍甚載聲華忠義可無憾公今有世家

公歸未百年鶴巢荒古屋我吟殄瘁詩悲風韻喬木

傷心祠下亭在時公燕處臨水不相猜江鷗會人語

公有一杯酒與人同醉醒遺民能記憶欲語涕飄零

委徑問謠俗高丘省佃作昔遊非苟然今花幾開落

在昔實方枘成功見圓機九原尚友心白首要同歸

人去洲渚在春回花草斑清談值淵對發興如江山

落日銜城壁祠東更一遊悲來惜酒少安得董糟丘

和師厚接花

妙手從心得接花如有神根株穰下土顏色洛陽春
雍也本犁子仲由元鄙人升堂與入室只在一揮斤

和師厚栽竹

大隱在城市此君真友生根須辰日斲筍要上番成龍
化葛陂去風吹阿閣鳴草荒三徑斷歲晚見交情

次韻外舅謝師厚喜王正仲三丈奉詔禱南岳回

至襄陽捨驛馬就舟見過三首

漢上思見龐德公別來悲歎事無窮
聲名籍甚漫前日須鬢索然成老翁
家釀已隨刻漏下園花更開三四紅
相逢不飲未為得聽取百鳥啼怱怱

能來問疾好音傳蹇步昏花當日痊
烹鯉得書增目力呼兒扶立候門前
游談取重慙犀首居物多羸味計然
惟有交親等金石白頭忘義復忘年

語言少味無阿堵冷

一作冰

雪相看有此君燈火詩書如

夢寐麒麟圖畫屬浮雲平章息女能為婦歡喜兒曹解
綴文憂樂同科惟石友別離空復數朝曛

百花洲雜題

范公種竹水邊亭漂泊來游一客星神理不應從此盡
百年草樹至今青

竹下把酒

竹下傾春酒愁陰為我開不知臨水語更得幾回來

砌臺晚思

目極江南千里春誰今灑筆可招魂
向人猶作故時面
翠竹蒼烟一萬根

山谷外集卷六

謹案第十頁前一行酒名麴米出雲安刊本麴訛

淘據宋詩鈔改

第二十九頁前五行夏裁醉竹餘千箇刊本裁訛

我今改





總校官庶吉士臣張能照

校對官中書臣王家賓

謄錄監生臣姚元開